


Gnéasachas sa Spórt

Ceist 1

Beidh tú ag féachaint ar ball ar thuairisc faoi ghradam a bronnadh ar Ada Hegerberg. Pléigh na ceisteanna seo leis an duine in aice leat sula bhféachann tú ar an mír.

1. Cad é ábhar na míre, dar leat?
2. Cad atá ar eolas agat faoin scéal seo cheana féin?



Ceist 2

Cad is brí leis na focail seo a bheidh le cloisteáil sa mhír?

*mímhúinte
mí-oiriúnach
in aois seo na gluaiseachta **Me Too**
céim chun cinn
feimineach
áiféiseach
íslíú céime
bheith thíos le rud
dúshláin
líomhaintí*

Féach ar an tuairisc den chéad uair. An dtuigeann tú na focail níos fearr nuair a chloiseann tú iad i gcomhthéacs?

Ceist 3

Féach ar an tuairisc den dara huair agus freagair na ceisteanna seo:

1. Cé hí Ada Hegerberg?
2. Cén fáth a bhfuil sí sa nuacht?
3. Cad a bhí le rá ag Réaltán Ní Leannáin faoin scéal?
4. Cad is brí leis an téarma Béarla a d'úsáid Réaltán Ní Leannáin?
5. Cad iad na dúshláin atá le sárú ag na mná ar fhoireann sacair na hAfganastáine?

Ceist 4 '...níos gaire...' agus '...níos mó...'

Cuir an leagan ceart den aidiacht tar éis **níos**.

beag
deas
mí-oiriúnach
cáiliúil
sásta
álainn
éasca
deacair

Ceist 5 '...An Fhrainc...'

1. Cén tír eile a luadh sa mhír?
2. Cad a thugtar ar dhuine ón bhFrainc, ó Éirinn, ó na Stáit Aontaithe, ón nGearmáin agus ón Iodáil?
3. Cén Ghaeilge atá ar *Spanish food*, *French wine*, *Japanese car*, *Chinese books*?

Ceist 6 Pléigh na ceisteanna thíos leis na daoine eile i do ghrúpa.

1. Cad a cheapann tú féin faoin méid a dúirt Martin Solveig le Ada Hegerberg?
2. An bhfuil cur amach agat féin ar an gcineál seo gnéasachais? Mínigh.
3. Tá feabhas tagtha ar an scéal maidir le comhionannas inscne le cúpla bliain anuas. Conas?

Treoracha agus Freagraí

Ceist 1

Tá an plé seo le déanamh sula seinntear an tuairisc.

Ceist 2

- | | |
|---|--|
| 1. <i>rude</i> | <i>mímhúinte</i> |
| 2. <i>unsuitable</i> | <i>mí-oiriúnach</i> |
| 3. <i>in this age of the Me Too Movement</i> | <i>in aois seo na gluaiseachta Me Too</i> |
| 4. <i>a step forward</i> | <i>céim chun cinn</i> |
| 5. <i>feminist</i> | <i>feimineach</i> |
| 6. <i>ridiculous</i> | <i>áiféiseach</i> |
| 7. <i>degradation</i> | <i>íslíú céime</i> |
| 8. <i>to lose out, suffer consequences of</i> | <i>bheith thíos le rud</i> |
| 9. <i>challenges</i> | <i>dúshlán</i> |
| 10. <i>allegations</i> | <i>líomhaintí</i> |

Ceist 3

Féach an script.

Ceist 4

Níos lú
Níos deise
Níos mí-oiriúnaí
Níos cáiliúla
Níos sásta
Níos áille
Níos éasca
Níos deacra

Ceist 5

1. An Afganastáin.
2. Francach, Éireannach, Meiriceánach, Gearmánach agus Iodálach
3. Bia Spáinneach, fíon Francach, gluasteán/carr Seapánach, leabhair Shíneacha.

Ceist 6

Is féidir triúr nó ceathrar a chur ag déanamh an phlé seo agus ansin na ceistanna a phlé leis an rang iomlán.

Eibhlín Ní Choistealbha

Tá cáineadh géar déanta ar an tslí ar bronnadh gradam mór idirnáisiúnta sacair ar imreoir cáiliúil aréir. Ba é seo an chéad uair riamh a bronnadh gradam *Ballon d'Or* ar bhean. Nuair a fógraíodh Ada Hegerberg ina buaiteoir, cuireadh ceist mhímhúinte agus mhí-oiriúnach¹ uirthi agus í ar an stáitse.

Caoimhe Ní Laighin

In aois seo na gluaiseachta *Me Too* agus díospóireachtaí eile, tá céimeanna chun cinn á nglacadh ó thaobh chearta na mban de. Aréir tógadh céim eile chun cinn, ach céim ar chúil ag an uair chéanna.

Martin Solveig

Est-ce que tu sais twerker?

Ada Hegerberg

Non.

Réaltán Ní Leannáin: Feimineach, Máthair, Údar

Bhuel anois, an chéad uair riamh a² bronnadh duais ar bhean don sacar, ag an *Ballon d'Or* sa Fhrainc. Agus, cén cheist a chuireann siad uirthi? An bhfuil tú in ann tvueirceáil? Tá sé áiféiseach.

Máire Úna Ní Bheaglaioich: Feimineach agus Ceoltóir

Is uafásach an rud é sin a dhéanamh le haon duine, aon duine, agus is iad na mná i gcónaí a bhíonn thíos leis an saghas ísliú céime seo.

Bríd Smith, TD, Dlúthpháirtíocht – Pobal Seachas Brabús

Bíonn cailíní an-óg ag féachaint ar *Ballon d'Or* agus cén saghas teachtaireachta a thugann an rud seo dóibh?

Caoimhe Ní Laighin

Níos gaire don bhaile, bhí gradam sháirimreoirí peileadóirí ban na bliana ar siúl i mBaile Átha Cliath aréir, agus cén ceannteidil a bhí sna nuachtáin ar maidin?

Bríd Smith, TD, Dlúthpháirtíocht – Pobal Seachas Brabús

Ní déarfaí riamh faoi fhir sa GAA go bhfuil cultacha³ deasa orthu, ach tá sé ceart go leor é seo a rá mar gheall ar mhná sa GAA.

Réaltán Ní Leannáin: Feimineach, Máthair, Údar

Tá níos mó iontu siúd ná 'coat hangers'.

Caoimhe Ní Laighin

Agus ar an taobh eile den domhan tá dúshláin níos mó fós le sárú ag mná i gcúrsaí spóirt. Tuairiscíodh inniu go bhfuil FIFA ag fiosrú líomhaintí faoi mhí-úsáid ghnéis atá déanta ag mná i bhfoireann sacair náisiúnta na hAfganastáine.

Caoimhe Ní Laighin, Nuacht TG4.

¹ mímhúinte agus mí-oiriúnach a dúradh

² gur a dúradh

³ culaith a dúradh